

ւանը պատմական յիշատակ չէ միայն, նա թագնուած տենդ է, կենդանի մսերի սարսուռ, նրբագին երաժշտական գործիք, որի լարերի վրայ ահա այսօր դարունը իր վարդազոյն մատերն է փռում եւ հին դինու նման ժայռերի երակները վառում:

Ո՞վ է մեղաւոր, եթէ բուրումների մէջ կորած մեր կուրացած աչքերը այլեւս ծաղիկները չեն տեսնում: Այն ծաղիկները, որոնցով արարողական ձեռքը օծում է պարզահոգիների եւ մանուկների ճակատը, որպէսզի նրանք արժանանան մշտնջենական կենդանի մարմնի եւ արիւնի հաղորդումի, եւ ճակատը դեղնած դիակների, որպէսզի մահը լինի բուրումնաւէտ եւ յարութիւնը վստահ:

Հայաստանի որոշ վայրերը ու մանաւանդ Սեւանը հասկանալու համար, պէտք է դռնել խորհուրդների բանալին: Աղքատիկ եւ պարզուկ այս գրքի մէջ եթէ մէկը ծածկածածուկ նշանները չգտնի՝ ոչինչ չի կարող հասկանալ: Երբ ծերունի Գեօտէն հասաւ Սիկիլիա եւ կանդ առաւ Ջիրջենտիի մօտ, նա արձանագրեց. «Այստեղ է բանալին ամենայն բանի»: Այդ ամենայն բանը՝ Հելլադան էր եւ իր մշակոյթը: Բայց Գեօտէն, որի մայրը, ըստ արգի գերմանացի ցեղաբաններին, իր երակների մէջ հայկական արիւն էր կրում, Գեօտէն մոռանում էր, որ իր բանալին բաց էր արել միայն Թիրենեան ծովի մութ կապոյտ դուռը, դէպի Պլուրաքսիթէլ եւ Հոմերոս տանող արեւային երկիրը եւ որ այնտեղ, հեռուում, կայ մի աշխարհ, աւելի բարդ ու աւելի խորհրդաւոր, որտեղից — ասում են ուրիշ արգի հետազոտողներ — Լեօնարդօ Գա Վինչին վերադարձել էր նոր խոհերով լեցուն եւ վառուած աչքերով:

Հայաստանի բանալին թագնուած է հազար շերտերի տակ, բայց ով որ դռնի՝ կարող է բոլոր դռները բանալ: Արեւմուտքի եւ Արեւելքի:

Այստեղ է բանալին ամենայն բանի:

Սեւանը մօտ է բոլոր աշխարհներին, որովհետեւ նա բարձրաբարձր հոգեկան կայան է, որտեղ կուտակուած են հիւսիսից եւ հարաւից, վերից եւ վարից եկող բոլոր հոսանքները եւ որտեղից աննշարելի հոգեկան հոսանքներ

են անցնում դէպի աշխարհիս ճակատագիրը կանոնաւորող վայրերը:

Աչքերս վրաս եմ փակում եւ ամբողջ լարուած կեանքով լսում եմ: Այստեղ տեսանողը միայն կարող է տեսնել եւ միայն նա կարող է լսել ներքին աշխարհների լուսաձայն ու դիօն:

Ամէն ինչ համատիեզերական է եւ արարողական:

Ձայն, գոյն լոյս՝ խոնոնուած: Պատարագ՝ լերան դադաթի վրայ ասուած, աշխարհի չորս կողմից եկած ձայներով: Ու արեւը արծաթէ պատմուճան է հայկական բարձրաւանդակի վրայ ձգուած, լիճը աւազան է, ուր կնքում են դարուն եւ ձմեռ, ե՛ւ աշնան դեղին մեղմադձութիւնը, ե՛ւ դարնան աւետաբեր ու բերկրաւի պարը:

Լիճը... Հոռոմայ բլուրների մօտ փռուած կապոյտ աւազանի մէջ մարդիկ որոնում են դարեր առաջ խորտակուած՝ Կեսարների մեծափարթամ նաւը: Բրոնզով եւ ոսկիներով քանդակուած պատմական այն յիշատակը, որի վրայ գինին, կինը եւ հեշտանքը մեղմ երազանքի խարոյկներ են վառած: Մարդիկ նայում են շացած աչքերով եւ նաւի քանդակուած բեկորների առջեւ մերկացած կանանց սարսուռը եւ հմայիչ ստուերներն են տեսնում:

Այստեղ, Սեւանայ լիճի մէջ, առայժմ միայն երկինքն է խորտակուել, որովհետեւ հայ ոգին կորցրել է իր բանալին:

Կորցրել է իր բանալին եւ փութփութացնող աժան մօթօրի ետեւիցն է վազում: Վանքից փախած արեղայի կամ, ճեմարանի ննջարանում, սեռային երազանքից այլասերուած աշակերտի գլխում ջուր կտրած աստուածներ է որոնում, «նոր» աստուածներ: Ու այն էլ, այստեղ, քարացած մումիայի մարմնով, ճրգնաւորի ոսկրացած կրճի նման թշուառ այս վայրում...

Հայաստանեայց Առաքելական այս կայանը չունի Կեսարների եւ Աղեքսանդր Բօրլիանների շքեղազարդ, հզոր եւ շուայտ պալատների յիշատակը. նրա թագը Մաշթոցի քարայրն է եւ կիսախարխուլ մատուռը, որի սեղանի վրայ մոմի եւ արիւնի հետքեր կան: Այստեղ, աղը չրթունքներին կպած, կանգ է առնում